



PROJEKAT
**PODRŠKE
 GRAĐANIMA
 U BORBI
 PROTIV
 KORUPCIJE**
 NEWSLETTER ZA IV KVARTAL 2020.



USAID
 OD AMERIČKOG NARODA



CENTRI CIVILNIH INICIJATIVA
 CENTRE OF CIVIL SOCIETY INITIATIVES



TRANSPARENCY
 INTERNATIONAL
 BOSNA I HERCEGOVINA



CRM@



Zbog NETRANSARENTNE
 DODJELE SREDSTAVA,
 nema podrške za sve
 organizacije u Brčko distriktu!



PROJEKAT PODRŠKA GRAĐANIMA U BORBI PROTIV KORUPCIJE

Newsletter za period IV kvartala 2020

Projekat „Podrška građanima u borbi protiv korupcije (ACFC)“ provode Centri civilnih inicijativa (CCI), kao glavni implementator, te Transparency International BiH (TIBiH) i Centar za razvoj medija i analize (CRMA) kao partneri na projektu, a podržan je od strane Američke agencije za međunarodni razvoj (USAID). Projekat se implementira u periodu septembar 2019 – septembar 2024. godine.

Cilj projekta ACFC je povećati učešće građana u borbi protiv korupcije, te su sve projektne aktivnosti dizajnirane i osmišljene na način da potiču snažan i održiv antikorupcijski aktivizam u cijeloj zemlji i na svim nivoima. Projekat ACFC ima za svrhu da civilno društvo bude reprezentativno i kredibilno u borbi protiv korupcije.

U okviru projekta realizuju se sljedeće aktivnosti:

- Monitoring i zagovaranje antikorupcijskih legislativa u sljedećim oblastima: sukob interesa, zaštita zviždača, javne nabavke i zloupotreba javnih sredstava u izbornim kampanjama;
- Uključivanje građana i izgradnja kulture koja odbacuje korupciju
- Koordinacija i izgradnja kapaciteta uključenih organizacija.

Antikoruptivni aktivisti širom Bosne i Hercegovine



Konjic

- UG "Pusti me da tečem"

Mostar

- UG "Jer nas se tiče"
- Ekološka udruga Majski cvijet

Brčko

- NGG "Za transparentno finansiranje neprofitnih organizacija iz budžeta Brčko distrikta"

Doboj

- NGG "Za legalnu eksploataciju minerala iz korita rijeke Bosne"
- NGG "Licencirane i akreditovane visokoškolske ustanove - validne i priznate diplome"

Maglaj

- NGG "Zaustavimo nelegalnu eksploataciju šljunka u Maglaju"

Višegrad:

- NGG "Odranimo rijeke Višegrada"

Vitez

- NGG "Hrabre žene Kruščice"
- NGG "Naše zgrade - naše pravo da znamo"

Sarajevo

- NGG "Hastahana park"

Foča

- UG "Bjelava"

Goražde

- NGG "Spasimo Drinu"

Zenica

- NGG "Inicijativa za namjensko i transparentno trošenje sredstava Fonda za zaštitu okoliša FBiH"

Trnovo

- NGG "Stop nelegalnom odlaganju otpada na Krupačkim stijenama"

Istočno Sarajevo

- NGG "Stop izgradnji mHE na Kasindolskoj rijeci"

Jablanica

- UG "Za Doljanku"



NE DOZVOLIMO DA NAM UKRADU RIJEKU

Udruženje građana „Za Doljanku“ je sastavljeno od mještana okolnih naselja koji su pokrenuli inicijativu za zaustavljanje radova na izgradnji i puštanja u rad minihidroelektrane Zlate, na rijeci Doljanci, koja predstavlja prirodno mrijestilište. Prema Zakonu o slatkovodnom ribarstvu na takvim rijekama zabranjena je izgradnja mHE.

U novembru su građani podnijeli krivičnu prijavu protiv Kantonalnog ministra poljoprivrede, šumarstva i vodoprivrede Donka Jovića zbog zloupotrebe položaja, jer se pored izdavanja nelegalnih dozvola i kršenja zakona oglušio na zahtjeve Federalnog resornog ministarstva koje je utvrdilo nepravilnosti i tražilo da ih otkloni.

Nakon toga je UG „Za Doljanku“ podiglo tužbu protiv FERK-a zbog rješenja kojim se izdaje dozvola za rad mHE Zlate na rijeci Doljanci. U predizbornom periodu Lokalnih izbora 2020. građani su se otvorenim pismom obratili svim kandidatima na lokalnim izborima u Jablanici. Od 140 kandidata kojima je zatraženo pojedinačno izjašnjenje po pitanju zabrane izgradnje mHE na rijeci Doljanci, samo 46 kandidata je dalo podršku zabrani izgradnje mHE a svi ostali, koji se nisu izjasnili, su objavljeni na stubu srama.



„Tu sam odgojena, rođena, ja, moji roditelji, moja djeca. Doljanka je što je dio naših života“,

Naza Spahić, mještanka



Udruženje građana „Za Doljanku“



Jablanica



info@doljanka.ba



www.doljanka.ba



„Od 2014. godine možemo reći da smo svi mi, građani Doboja, u strahu od svake jače padavine, jer one na neki način mogu da izazovu poplavu“




Zoran Panić, građanin Doboja.

Građani sa područja Doboja su organizovali jednu, dok su građani iz Modriče, Vukosavlja i Šamca organizovali drugu grupu građana sa ciljem da se bore protiv nelegalne eksploatacije šljunka iz rijeke Bosne, jer neadekvatna kontrola eksploatacije riječnog šljunka direktno ugrožava preko 100.000 stanovnika ovog područja.

Kao rezultat višemjesečne borbe ove neformalne grupe građana, dobojsko tužilaštvo je počelo reagovati na prijave građana te je pokrenulo postupak utvrđivanja odgovornosti zbog gradnje na vodoplovnom području rijeke Bosne kod Doboja, eksploatacije minerala iz rijeke Bosne na lokalitetima kod Modriče i Vukosavlja i eksploatacije šljunka iz korita rijeke Usore na području Teslića. Osim toga, prema navodima Ministarstva poljoprivrede, šumarstva i vodoprivrede RS, postojeći zakoni onemogućavaju bolju kontrolu i nadzor nad eksploatacijom šljunka iz riječnog korita i poljoprivrednog zemljišta u njegovoj blizini

NEUREĐENA EKSPLOATACIJA ŠLJUNKA = POPLAVE



-  Neformalna grupa građana “Za legalnu eksploataciju minerala iz korita rijeke Bosne”
-  Dboj, Šamac, Modriča, Vukosavlje
-  Eksploatacija minerala iz korita rijeke Bosne

STUB SRAMA

SBH, SBiH, BPS-S.M. (KOALICIJA ZA MOSTAR 2020);
HOZ 1990;
HRVATSKA SELJAČKA STRANKA STJEPANA RADIĆA;
NEZAVISNA LISTA DOBOJ-SEVLID NURTIĆ;
BOSANSKOHERCEGOVAČKI DEMOKRATI
-DŽEBRAIL BAJRAMOVIĆ;
OSTAJTE OVDJE -ZAJEDNO ZA NAŠ MOSTAR;
LLJEVO KRILLO;
HOZ BiH;
MOSTAR MOJ DOM (HSP-HSPBiH HKDU-HRAST);
HRS;
A-SDA STRANKA DEMOKRATSKE AKTIVNOSTI;
LDS;
KARADŽA LAMIJA nezavisni kandidat;
HRVATSKA STRANKA PRAVA DR. ANTE STARČEVIĆ BIH;
HRVATSKA DEMOKRATSKA UNIJA BIH;
REPEŠA OSMAN nezavisni kandidat;
SAVEZ ZA STARI GRAD;
KLJAJO DAMIR nezavisni kandidat;
HSS STJEPAN RADIĆ;
NEZAVISNA BiH LISTA;
SAVEZ MLADIH SNAGA;
POKRET MOST 21;
LIBERALNA STRANKA BiH;
MAKSUMIĆ ANIDA nezavisni kandidat

JER NAS SE TIČE!

„Ovdje se igraju naša djeca, Uborak je problem svih nas“

Građani koji stoje iza inicijative „Jer nas se tiče“, su stanovnici Mostara i okolnih mjesta koji pokreću proteste, peticije, zahtjeve i sudske sporove protiv nadležnih institucija, jer nastoje dugoročno osigurati zatvaranje deponije Uborak i njenu sanaciju, te donošenje odluke o određivanju nove lokacije za regionalnu deponiju i usvajanje i poštovanje propisa koji će spriječiti njen štetan uticaj na okolinu i zdravlje stanovništva.

Na press konferenciji koju je održala u oktobru, inicijativa „Jer nas se tiče“ je obavijestila javnost o svim sumnjivim radnjama koje Grad Mostar, uz podršku Federalnog ministarstva za okoliš, provodi na lokaciji deponije Uborak te je nakon toga podnijela krivične prijave protiv Federalne ministrice zaštite okoliša i federalnog inspektora zbog zloupotrebe položaja i ovlasti.

Također, građani su se u predizbornom periodu Lokalnih izbora 2020. otvorenim pismom obratili kandidatama za Gradsko vijeće Mostara sa zahtjevom za izjašnjenje po pitanju zatvaranja deponije Uborak i njeno izmještanje na drugu lokaciju. Od 370 kandidata, samo 76 kandidata je poslalo svoje odgovore u kojima su se izjasnili da su za zatvaranje,

a oni koji nisu odgovorili javno su prozvani tako što su njihova imena izvješena na stub srama pred deponijom.

Na javnoj raspravi koju je organizovalo Ministarstvo saobraćaja po pitanju izgradnje poddionice puta na autoputu Vc, građani su uspjeli svojim prigovorom promijeniti plan da se otpad sa gradilišta odlaže na deponiji Uborak. Inicijativa „Jer nas se tiče“ je simboličnom vožnjom kroz grad i sirenama podsjetila građane Mostara na godišnjicu napada policijskih snaga na građane ispred deponije Uborak.

Ukoliko želite da date svoju podršku građanima koji se bore za zatvaranje i izmještanje deponije Uborak, možete potpisati online peticiju putem linka:

https://www.peticije.online/peticija_za_zatvaranje_ilegalne_deponije_i_otvaranje_nove_lokacije



Građanska inicijativa „Jer nas se tiče“



Mostar



jernassetice@gmail.com



@jernasseticemostar



JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI **BORBE PROTIV KORUPCIJE**



KONTINUIRANI JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE

Poziv OCD (udruženjima građana i fondacijama) iz BiH da podnesu prijedloge projekata usmjerenih na borbu protiv korupcije, s fokusom na rješavanje konkretnih problema identifikovanih na lokalnom nivou ili zagovaračkih inicijativa usmjerenih ka višim nivoima vlasti.

Od aplikanata se traži da dostave ispunjenu aplikacionu formu, te ostale aplikacijom zahtijevane dokumente i to isključivo putem on-line platforme za apliciranje dostupne na linku:

<http://tender.protivkorupcije.ba/>



MLADI ŽELE PRIZNATE I VALIDNE DIPLOME



U Bosni i Hercegovini djeluje više od 40 visokoškolskih ustanova koje funkcionišu u 12 obrazovnih sistema, a mladi koji se obrazuju žele da diplome koje steknu budu priznate kako kod nas tako i u svijetu. Pripremna istraživanja i analiza su pokazali da postoje visokoškolske ustanove koje nemaju validne licence i akreditacije, a koje bez ikakvih sankcija izdaju diplome studentima, direktno ugrožavajući njihov položaj i prava na tržištu rada. Neformalna grupa studenata, okupljena oko problema nelegalnog rada visokoškolskih ustanova u Republici Srpskoj i izdavanja diploma od strane nelicenciranih i neakreditovanih ustanova bori se za rješavanje ovog problema.




Grupa studenata je temeljnom analizom registara Agencije za visoko obrazovanje RS i Agencije za visoko obrazovanje i osiguranje kvaliteta BiH, kao i prikupljenim informacijama na terenu kreirala i publikovala liste akreditovanih fakulteta u RS po tumačenju dvije Agencije.

Na osnovu istraživanja legalnosti rada visokoškolskih ustanova, utvrđen je niz problema u radu Slobomir P Univerziteta, te je na osnovu Zahtjeva za pristup informacijama koje je grupa studenata dostavila Inspektoratu RS, uslijedio Vanredni inspekcijski nadzor i naloženo ispravljanje nepravilnosti.



„Generalni problem su diplome - studenti trpe ogromne posljedice jer po završetku studija ne mogu ostvariti svoja prava na tržištu rada, a uložili su mnogo truda, sredstava i vremena“;

Danijela Nikolić, studentica.

-  Neformalna grupa građana “ Licencirane i akreditovane visokoškolske ustanove - validne i priznate diplome “
-  Doboj
-  Licencirane i akreditovane visokoškolske ustanove - validne diplome



NAŠE RIJEKE, NAŠE PRAVO NA OPSTANAK







Udruženje građana „Bjelava“, te neformalnu grupu građana Sačuvajmo rijeke Foče osnovali su građani Foče kako bi započeli borbu protiv izgradnje mHE na rijekama Bjelava, Velika i Mala Bjelava. U jeku pandemije koronavirusa, u martu 2020. godine, preduzeće „Srbinjeputevi“ započelo je pripreme radove na izgradnji dvije male hidroelektrane na rijekama Bjelava i Mala Bjelava na području opštine Foča, iako je tek nakon mjesec dana dobijena zvanična dozvola za početak radova na terenu.

Uprkos zahtjevu građana za posebnom tematskom sjednicom sa temom izgradnje mHE Bjelava, zakazana je redovna 41. sjednica Skupštine Opštine Foče, na kojoj su se građani Foče trebali obratiti odbornicima i predstavnicima lokalne izvršne vlasti sa zahtjevima za obustavu radova na izgradnji mHE na rijekama Bjelava, Mala i Velika Bjelava. Tim povodom građani su organizovali i performans ispred zgrade u kojoj se sjednica trebala održati. Ipak, zakazana sjednica je otkazana zbog nedostatka kvoruma, što se nije desilo u posljednjih 10 godina.

Pored činjenice da je MUP RS-a Okružnom tužilaštvu u Trebinju podnijelo izvještaj protiv lica iz Foče u vezi sa bespravnom izgradnjom mHE, propusti i nepravilnosti su u ovom procesu nastavljeni te je Komisija za koncesije dala saglasnost investitoru na izmjene koncesionog ugovora na gradnju mHE Bjelava. Na sastanku sa predstavnicima UG Bjelava Vlada RS-a je potvrdila da je i ona dala saglasnost na aneks ugovora o koncesiji za malu hidroelektranu na Bjelavi.

„Ovo znači da ćemo se morati iseliti odavde, kada ne bude rijeke i ovog korita, kad ne budemo imali vodenice, mi nemamo šta više ovdje raditi“,

Miloš Vujičić, mještanim i vlasnik vodenice na rijeci Bjelava.

-  Udruženje građana „Bjelava“, Foča
-  Foča
-  ugbjelava@gmail.com
-  [SacuvajmoRijekeFoce; ugbjelava](#)



12 neprofitnih organizacija, okupljenih u neformalnu grupu "Za transparentno finansiranje neprofitnih organizacija iz budžeta Brčko distrikta" bore se za povećanje transparentnosti, a smanjenje korupcije i zloupotrebe javnih sredstava u procesu finansiranja neprofitnih organizacija u Distriktu.

U Skupštini Brčko distrikta BiH je konačno usvojen Zakon o udruženjima i fondacijama Brčko distrikta što predstavlja jedan je od koraka ka uređivanju stanja u oblasti finansiranja neprofitnih organizacija u Brčko distriktu, odnosno prekida netransparentne i koruptivne prakse u ovoj oblasti, a neformalna grupa "Za transparentno finansiranje neprofitnih organizacija iz budžeta Brčko distrikta" je nakon održanih javnih rasprava sastavila i pravnu analizu Nacrta i Prijedloga Zakona o udruženjima i fondacijama Brčko Distrikta.

KOME IDE NOVAC GRAĐANA

"Mora se stati u kraj malverzacijama i manipulacijama - postoje fantomska udruženja koja naš novac zbog ko zna kakvih interesa iskorištavaju",

Davor Simikić,

Udruženje Turistička zajednica Brčko Distrikta BiH



Zbog NETRANSSPARENTNE DODJELE SREDSTAVA, nema podrške za sve organizacije u Brčko distriktu!



- Neformalne grupe "Za transparentno finansiranje neprofitnih organizacija iz budžeta Brčko distrikta"
- Brčko
- GrantoviNVOBrckoDistrikt



SPASIMO DRINU






Neformalna grupa građana sastavljena od mještana naselja Luka u Goraždu, pokrenula je inicijativu za borbu protiv gradnje zidova na obali rijeke Drine. Na planiranju i gradnji obaloutvrde u naselju Luka intenzivnije se počelo raditi nakon poplava iz decembra 2010. godine, koje su uzrokovane velikim padavinama i nekontrolisanim ispuštanjem vode iz HE „Piva“ Mratinje. Tada je građanima ovog grada nanesena ukupna šteta veća od 15 miliona maraka.

Građani su početkom oktobra održali press konferenciju povodom rješenja Ministarstva prostornog uređenja Federacije BiH kojim je poništena urbanistička saglasnost kao i odobrenje za građenje obaloutvrde na rijeci Drini u goraždanskom naselju Luka. Ove dokumente je Ministarstvo proglasilo ništavnim, jer Gradska uprava Goražda nije nadležna za njihovo izdavanje. Za izdavanje urbanističke saglasnosti za građevine na vodotocima prvog reda, u koje spada i rijeka Drina, nadležno je isključivo Federalno ministarstvo prostornog uređenja. S obzirom na to da se radi o zloupotrebi višemilionskog projekta građani su pokrenuli krivične prijave protiv odgovornih iz Grada Goražda.

Krajem godine, grupa je uputila novogodišnje čestitke nadležnim institucijama i pojedincima (ministarstva, Grad, gradonačelnik, opštinski vijećnici) u kojima je zatražila da u novoj godini budu na strani građana i rade u interesu građana, a suprotstave se netransparentnosti, korupciji i pogodovanju pojedincima.



„Ne damo Drinu, Drina nam je sve“
Mirsad Kadrić, mještanin

-  Neformalna grupa građana
“Spasimo Drinu”
-  Goražde
-  Spasimo Drinu



HRABRE ŽENE KRUŠČICE






Grupa mještanki iz sela Kruščice u Vitezu okupila se u borbi protiv izgradnje mHE na rijeci Kruščici te su simbolično nazvane Hrabre žene Kruščice pošto su više od 500 dana i noći blokirale most preko istoimene rijeke, kako bi spriječile izgradnju dvije mini hidroelektrane. One su svojim tijelima spriječile investitore da započnu izgradnju mini hidroelektrana 2017. tako što su u više navrata blokirale prolaz građevinskim strojevima na „mostu“ koji je sada već simbol otpora običnog čovjeka pravnom nasilju zarad privatnih interesa.

Hrabre žene Kruščice su krajem decembra predale inicijativu za formalnu zaštitu Kruščice koju su pokrenuli mještani lokalne zajednice u Kruščici, a koja se odnosi na brisanje malih hidroelektrana Kruščica 1 i Kruščica 2 iz Prostornog plana ove mjesne zajednice. Inicijativu je potpisalo 2.000 građana, a još jedan od zahtjeva unutar inicijative odnosi se na zabranu eksploatacije rijeke Kruščice u bilo koje svrhe osim za osiguranje vodosnabdijevanja i pitke vode i promocije turizma.

U predizbornom periodu Hrabre žene Kruščice su uputile Otvoreno pismo svim kandidatima na Lokalnim izborima 2020. za Općinsko vijeće Vitez te su održale sastanke sa kandidatima za načelnika, koji su dali podršku inicijativi.

„Mi smo stalno na oprezu i nastavljamo da branimo most, jer znamo da je još uvijek dug put pred nama da zaštitimo naše rijeke i zajednicu od investitora”,

Tahira Tibold, mještanka

-  Neformalna grupa građana „Hrabre žene Kruščice“
-  Kruščica, Vitez
-  Ekološko društvo Bistro



Građani Mostara zajedno sa ekološkom udrugom Majski cvijet, pokrenuli su inicijativu protiv izgradnje mini hidroelektrana Buna 1 i 2 na rijeci Buni. Na lokalitetu Bunskih kanala početkom juna 2016. godine trebalo je da počne gradnja dvije mini hidroelektrane kapaciteta do pet megavata. Dodjela ove koncesije sporna je ne samo zbog činjenice da se lokalitet nalazi u dijelu toka Neretve koji je ranijom odlukom proglašen spomenikom prirode u ekološko-ribarskoj zoni, zaštićenim posebnim staništem, već i zbog podatka da je nadležno ministarstvo dodijelilo koncesiju bez saglasnosti lokalne zajednice i Gradskog vijeća.

Predstavnici ekološke udruge Majski cvijet su u oktobru održali vanrednu press konferenciju povodom presude Kantonalnog suda u Sarajevu kojom se poništava okolinska dozvola koju je Federalno ministarstvo okoliša i turizma izdalo za gradnju dvije mHE na Bunskim kanalima. U skladu sa presudom, postupak se mora ponovo provesti zbog neregularnosti u izdavanju i zanemarivanju činjenica koje su predstavnici nevladinih organizacija ranije isticali. Nakon toga je Odjel za urbanizam Grada Mostara drugi put zaredom donio rješenje kojim se odbija zahtjev investitora za izdavanje urbanističke suglasnosti za izgradnju mHE na Bunskim kanalima, a na osnovu toga što je ekološka udruga „Majski cvijet“ dostavila neophodnu dokumentaciju i peticiju sa 5000 potpisa građana protiv izgradnje ove dvije mHE.

STOP IZGRADNJI MHE NA BUNSKIM KANALIMA



U predizbornom periodu Lokalnih izbora 2020. u Mostaru, građani su na adrese 370 kandidata za Gradsko vijeće poslali Otvoreno pismo sa zahtjevom da se izjasne da li su protiv izgradnje mHE. Od 31 političkog subjekta, samo ih je 7 reklo da su protiv, a ostali su objavljeni na stubu srama.

Krajem 2020. godine građani su predali Ministarstvu trgovine, turizma i zaštite okoliša HNK zahtjev za upis Bunskih kanala u registar zaštićenih dijelova prirode Hercegovačko-neretvanskog kantona, jer se lokalitet Bunskih kanala nalazi u dijelu toka Neretve koji je ranijom odlukom proglašen spomenikom prirode u ekološko-ribarskoj zoni, zaštićenim posebnim staništem.

„Ovo što vlast radi ne bi palo na pamet ni Geringu, nekadašnjem njemačkom zlikovcu, koji je mrzio ljude, a nije prirodu, a ovi mrze i ljude i prirodu i lokalno stanovništvo“,

Miroslav Barišić, mještanim



Ekološka udruga Majski cvijet



Mostar



Stop izgradnji mHE na Bunskim kanalima

HASTAHANA PARK
TREBAMO VASU PODRŠKU!

HASTAHANA PARK

PRIKUPLJANE POTPISA ZA GRAĐANSKU INICIJATIVU

Grupa građana okupljenih oko inicijative Hastahana park pokrenula je borbu protiv radova koji mogu izmijeniti lokalitet parka Hastahana. Cilj ove inicijative je zaustavljanje bilo kakvih radova koji mogu izmijeniti lokalitet parka Hastahana prema uputi Povjerenstva za očuvanje nacionalnih spomenika do okončanja postupka proglašenja Povijesnog urbanog krajolika Sarajeva (Gradske ambijentalne cjeline Sarajeva) nacionalnim spomenikom te stavljanje van snage izmjene Regulacionog plana, jer su donesene suprotno mišljenju građana Općine Centar.

Oni su pokrenuli prikupljanje potpisa za građansku inicijativu kojom se traži da se poništi izmjena regulacionog plana za koju je potrebno 1207 potpisa građana opštine Centar i do kraja godine je prikupljeno oko 600 potpisa. Nakon što svi potpisi budu prikupljeni građani će inicijativu predati Općinskom vijeću na razmatranje.

HASTAHANA PARK

OBAVIJEST


GRAĐANSKA INICIJATIVA
HASTAHANA PARK



Građani su u predizbornom periodu Lokalnih izbora 2020. pozvali sve političke subjekte da se izjasne po pitanju problema Hastahana parka, a sve one koji se nisu oglasili kao i one koji su glasali za izmjenu regulacionog plana kojim je omogućena prodaja dijela parka su javno prozvali.

„Hastahana je park svih nas, on pripada različitim generacijama Sarajeva, djeci, mladima, penzionerima. To je mjesto sureta različitih generacija. Učinimo park istinskim parkom, ne dozvolimo betonu da zauzme to mjesto“

Sanida Hasanović Čar.

 Inicijativa Hastahana park

 Sarajevo

 Hastahana park



Neformalna grupa građana sastavljena od mještana Istočnog Sarajeva, pokrenula je inicijativu za borbu protiv izgradnje mini hidroelektrana na Kasindolskoj rijeci. Njemačka firma (Blautal Natureenergie GmbH, BUK d.o.o. Istočno Sarajevo) dobila je 2014. godine koncesije za izgradnju čak tri mini hidroelektrane na ovoj rijeci, mHE "Slapi", mHE "Podvič" i mHE "Samar" što bi ostavilo katastrofalne posljedice na biljni i životinjski svijet , ali i na zdravlje čovjeka. U 2015. godini uporedo sa izdavanjem ekološke dozvole za izgradnju mHE „Podvič“ 1,35 MW, Ministarstvo za prostorno uređenje, građevinarstvo i ekologiju RS izdaje ekološke dozvole za još dvije mHE „Samar“ 0,95 MW i „Slapi“ 0,925 MW na Kasindolskoj rijeci. Uprkos inicijativama koje su građani prilikom izgradnje upućivali nadležnim organima ukazujući na nelegalne radnje, nepoštovanje zakona i procedura, te kršenje ekoloških standarda, mini hidroelektrana "Podvič" na Kasindolskoj rijeci ipak je izgrađena. Naime, prilikom izdavanja ekoloških dozvola, obnove ekoloških dozvola i građevinskih dozvola za 3 mHE na Kasindolskoj rijeci nadležno Ministarstvo pogodovalo je investitoru na način što je donijelo Rješenja kojim se oslobađa investitor od izrade Studije uticaja na životnu sredinu, ekološke dozvole, te obnovljene ekološke dozvole isključivši javnost iz kompletnog procesa izdavanja dozvola što je suprotno odredbama Zakona o zaštiti životne sredine RS. Također, ni prilikom izdavanja lokacijskih uslova koji su preduvjet građevinskim dozvolama za tri mHE nije pribavljeno mišljenje lokalne zajednice na kojoj se planira gradnja što je suprotno odredbama Zakona o uređenju prostora i građenju RS.

INICIJATIVA PROTIV IZGRADNJE MINI HIDROELEKTRANA NA KASINDOLSKOJ RIJECI

Sporna je i činjenica da je, skoro 5 godina nakon izdavanja ekološke dozvole za drugu mHE „Samar“ tek u julu 2020. Ministarstvo za prostorno uređenje, građevinarstvo i ekologiju Republike Srpske izdalo i građevinsku dozvolu za istu, pri tome ne vodeći računa da je u međuvremenu moglo doći do promjene niza okolnosti koje su navedene u ekološkoj dozvoli. Pored promjena koje su se u tom vremenskom periodu mogle desiti u prirodi, prilikom izdavanja lokacijskih uslova i izmjena lokacijskih uslova koji prethode izdavanju građevinske dozvole za mHE „Samar“ nesumnjivo je izvršen niz promjena u projektu u odnosu na ekološku dozvolu, tačnije izvršena je promjena trase cjevovoda, promjene tipa vodozahvata, promjene trase pristupnog puta promjene hidromašinske opreme. Budući da ove izmjene predstavljaju značajne promjene, trebalo je pristupiti i izdavanju nove ekološke dozvole, a u sam postupak uključiti javnost kako bi mogli uputiti primjedbe i komentare, međutim nadležno Ministarstvo nakon isteka ekoloških dozvola na zahtjev investitora donosi Rješenja o obnovi ekoloških dozvola za sve tri mHE pojedinačno u septembru 2020.godine.

Trenutni cilj ove neformalne grupe građana je da se isticanjem nepravilnosti u toku izdavanja dozvola i pritiskom na donosioce odluka ospori rad mHE Podvič i zaustavi gradnja druge dvije planirane mHE.

“Način na koji se hidroelektrane grade, naročite male hidroelektrane u BiH je u većini slučajeva usko vezan sa koruptivnim djelovanjem i internim dogovorom između investitora i organa nadležnih za izdavanje koncesija, što je nedopustivo”

Sara Tuševljak, mještanka



NGG Stop izgradnji mHE na Kasindolskoj rijeci



Istočno Sarajevo



STOP izgradnji mHE na Kasindolskoj rijeci



“Ugroženo nam je pravo na vodu, pravo na vazduh, pravo na hranu jer sutra kada bude zagađenost podzemnih voda ogromna, biljke koje mi uzgajamo će biti otrovne”,

Roksanda Mičić, mještanka

Neformalna grupa građana koju čini mještani naselja Vojkovići (Istočna Ilidža) i Krupac (Trnovo) okupili su se kako bi ukazali na neregularnosti u radu deponije “Krupačke stijene” koja se nalazi na području opštine Trnovo. Naime, građani smatraju da je zbog nesavjesnog postupanja i zloupotrebe položaja od strane odgovornih lica u JKP „Trnovo“ usljed kršenja Ugovora od ugovorne strane Alba BiH d.o.o. i odlaganja na deponiju otpad za koji sumnjaju da nije isključivo komunalni otpad, njihovo zdravlje ugroženo. Mještani tvrde da u posljednjih nekoliko godina na deponiju „Krupačke stijene”, koja je u vlasništvu komunalnog preduzeća Trnovo, svakodnevno dolaze kamioni iz Federacije BiH te da se otpad odlaže i van radnog vremena deponije odnosno noću i vikendom.

Poseban problem je činjenica da mještani sumnjaju i raspolažu određenim informacijama da se na ovu lokaciju iz Hercegovine deponuje medicinski otpad. Radi se o kamionima firme za uklanjanje otpada i reciklaže Alba BiH d.o.o. Novim ugovorom, koji je potpisan 1. avgusta 2020. između direktora Albe i JKP Trnovo d.o.o. iz Trnova, uz znanje načelnika opštine Trnovo, definisano je da će se otpad odlagati radnim danima od 07 do 16h ali nije definisano koja vrsta otpada se odlaže.

U novembru 2020.g. republički ekološki inspektori su izvršili inspekcijski nadzor nad deponijom u Krupačkim stijenama na području Trnova, a povodom informacije da firma Alba BiH d.o.o. tu odlaže medicinski otpad. Vizuelnim opažanjem nisu uočili ništa sumnjivo. Ipak, republički inspektor je naložio firmi JKP “Trnovo” d.o.o. Trnovo, koja gazduje ovom deponijom, da angažuju ovlaštenu osobu iz oblasti zaštite životne sredine

INICIJATIVA ZA ZABRANU NEKONTROLISANOG ODLAGANJA OTPADA NA DEPONIJU KRUPAČKE STIJENE



koja bi trebala metodom slučajnog uzorka izvršiti analizu otpada. Prilikom kontrole ispunjenosti uslova za upravljanje otpadom utvrdili su da je izrađena studija izbora lokacije sa nastavkom eksploatacije deponije komunalnog otpada Krupačke stijene i idejni projekat sanacije, te da nije izrađen glavni projekat sanacije deponije Krupačke stijene. U rješenju od 23.10.2020.g. Odjeljenje za inspekcijske poslove grada Istočno Sarajevo, između ostalog, naređuje se poštovanje radnog vremena deponije (od 07 do 16h), međutim, kako mještani tvrde i nakon toga kamioni na deponiju dolaze mimo radnog vremena i vikendima. Također, ovim Rješenjem naloženo je da se u Ugovoru navede „komunalni otpad“ (otpada iz domaćinstva), te se naređuje JKP „Trnovo“ da svakodnevno prati vrstu otpada koji se doprema da li je u skladu sa ugovorenom vrstom otpada definisanom u dozvoli za upravljanje otpadom, međutim, prema tvrdnjama mještana, JKP do danas ne postupa po ovom Rješenju jer se otpad i dalje dovozi bez nadzornog organa mimo radnog vremena.

Trenutni cilj ove neformalne grupe građana je da od JKP Trnovo zahtijevaju da izvrši sanaciju deponije izradom glavnog projekta sanacije deponije Krupačke stijene kako je naložio republički ekološki inspektor, te pozovu na odgovornost sva lica koja upravljaju deponijom Krupačke stijene.



NGG Stop nelegalnom odlaganju otpada na Krupačkim stijenama



Vojkovići, Krupac



STOP odlaganju sumnjivog otpada na deponiju Krupačke stijene



NEZAKONITO TROŠENJA SREDSTAVA ZA ODRŽAVANJE ZGRADA U VITEZU

Vlasnici stanova i pravna lica u Općini Vitez imaju problema sa nezakonitim radom prinudnog upravitelja JSP "Vitez stan". Iako su zakonom i provedbenim propisima jasno propisana prava i obaveze prinudnog upravitelja, građani općine Vitez nemaju uvid u novčane tokove uplaćenog novca od obaveznih naknada koje uplaćuju svaki mjesec na račun JSP "Vitez stan" što stvara prostor zloupotrebi njihovih novčanih sredstava.

Princip prinudnog upravitelja primorava stanare zgrade da izaberu svog upravitelja i da svaki mjesec, a proporcionalno kvadraturi stana i prihvaćenim međuvlasničkim ugovorom, plaćaju pričuvu tj. naknadu za održavanje zajedničkih dijelova i uređaja zgrade.

Ukoliko stanari ne izaberu upravitelja samostalno, istog određuje općinski načelnik na prijedlog općinske službe. Prema članu 17. Zakona održavanje zajedničkih dijelova zgrade etažni vlasnici povjeravaju fizičkom ili pravnom licu koje je registrovano za te djelatnosti, a prema članu 18. istog Zakona naloženo je da upravitelj mora posjedovati rješenje o ispunjenosti uvjeta za obavljanje poslova upravitelja i certifikat upravitelja.

Dakle, ukoliko etažni vlasnici samostalno ne izaberu upravitelja sa liste registrovanih upravitelja, općinski načelnik im dodjeljuje prinudnog upravitelja. Kako je u na području općine Vitez jedino registrovano pravno lice za ove radove JSP „Vitez stan“ d.o.o. građani su „prinudeni“ da im prinudno bude dodijeljen upravitelj - JSP „Vitez stan“ u kojeg sumnjaju da na nezakonit način raspoláže njihovim novcem.

Iako su zakonom i provedbenim propisima jasno propisane prava i obaveze prinudnog upravitelja,

stanari općine Vitez nemaju uvid u novčane tokove uplaćenog novca od obaveznih naknada koje uplaćuju svaki mjesec na račun JSP "Vitez stan". Grupa stanara, koja je u proteklom periodu finansirala veće radove na zgradi (zamjena ulaznih vrata, krećenje stubišta, popravak krova i radove na utopljanju zgrade), a koje je vodio prinudni upravitelj, je izrazila svoje nezadovoljstvo odnosom upravitelja prema vlasnicima stanova. Stanari prilikom izvođenja radova na zgradi, koji su finansirani njihovim novcem, nisu na transparentan i zakonit način bili upućeni u troškove predviđene za ove radove, niti u postupak izbora najpovoljnijeg izvođača, nisu unaprijed obaviješteni ko su izvođači, koliki su stvarni troškovi radova, koliko sredstava imaju stanari na računu u momentu početka izvođenja radova, a koliko nakon izvedenih radova.

Iako su se povodom finansiranja radova na zgradi obratili JSP "Vitez stan" i Općini Vitez, uskraćeni su za informaciju ili dokument kojim bi trebao upravitelj informisati stanare po Zakonu i Pravilniku, što još više pojačava sumnje o korupciji. Stanari su se obraćali i predstavnicima Općine Vitez više puta, ali su dobili odgovor da ni oni ne mogu dobiti te informacije od direktora firme koja je prinudni upravljač, iako je Općina Vitez osnivač JSP "Vitez stana". S obzirom da JSP „Vitez stan“ vrši poslove upravljanja i u općinama Busovača i Travnik, građani sumnjaju da se ovim načinom rada upravitelja krije ogromna količina novca i ostvaruje korist i bogaćenje pojedinaca. Činjenica, da JSP "Vitez stan" upravlja sa oko 1000 stanova i poslovnih objekata u Vitezu dovoljno govori da stanari opravdano sumnjaju u malverzacije sa njihovim novcem. Također, stanari i pravni subjekti nemaju uvid u godišnji plan održavanja zajedničkih dijelova, visinu sredstava koje stanari uplaćuju svaki mjesec, kojim sredstava raspolážu stanari, iako te informacije trebaju biti javno dostupne.



NGG „Naše zgrade - naše pravo da znamo“



Vitez



Naše zgrade - naše pravo da znamo



“Nastojaćemo doprinjeti da se legalnom eksploatacijom šljunka iz korita rijeke Bosne ne dešavaju poplave kakve su Maglaj samo posljednjih godina zahvatale u više navrata, a posebno katastrofalne kakve su bile u maju 2014. godine”, kaže Zumra Gušo, mještanka

Problem neadekvatne, nekontrolisane, i najčešće koruptivne, eksploatacije šljunka postoji preko 20 godina, a posljedice njegovog postojanja su višestruke i najviše se ogledaju u uništavanju riječnih korita, poljoprivrednog zemljišta uz vodotokove, te direktnom ugožavanju stambenih i poslovnih objekata, saobraćajnica u blizini korita rijeke.

Nečišćenje korita rijeka od nekomercijalnog materijala i mulja i nekontrolisana eksploatacija šljunka su glavni uzroci katastrofalnih poplava 2014. godine, a od opština u FBiH Maglaj je bio najviše pogođen i pretrpio je najveće materijalne štete. Direktno štete bile su na poplavljenim domovima i drugim dobrima, osim u samom gradskom području, i u osam mjesnih zajednica maglajske opštine.

Nakon što su građani Doboja, Šamca, Modriče i Vukosavlja podigli svoj glas protiv nelegalne i netransparentne eksploatacije minerala u donjem toku rijeke Bosne, sada su građani u Maglaju, kao i iz drugih lokalnih zajednica u gornjem toku rijeke Bosne, izrazili želju da se uključe u rješavanje problema u njihovim sredinama.




Naime, šljunkari bez pribavljenih dozvola vade materijal iz vodotoka rijeke Bosne, a nadležna vodna inspekcija ne reaguje po službenoj dužnosti, dok se bez sankcije i bez prestanka vadi materijal iz vodotoka rijeke Bosne na lokalitetu Općine Maglaj.

To sve se čini dok je u toku dugotrajna procedura javne ponude, dakle dok još nisu dobijene potrebne dozvole za rad nego su tek u postupku pribavljanja istih, a niko sa nivoa lokalne samouprave ne prijavljuje dalje nadležnim institucijama nelegalne radove jer su najčešće u pitanju lokalna privredna društva. Alarmantno je da niti vodna inspekcija obilazi ove terene što je po službenoj dužnosti u njenoj nadležnosti.

ZA LEGALNU EKSPLOATACIJU MINERALA U GORNJEM TOKU RIJEKE BOSNE (FBiH)

Zabrinjava i to što pored nelegalne eksploatacije šljunka koju nadležni ne kontrolišu, postoje problemi na terenu, odnosno kada pravno lice dobije potrebne dozvole za vađenje šljunka. Ti problemi se ogledaju u vađenju većih količina šljunka nego što je to predviđeno elaboratom, ugovorom i vodnom dozvolom - dakle mnogo veće količine m³ nego što je to plaćeno, te zagađenje obale neiskorištenim otpadom. A, nadležni organi Agencija za vodno područje rijeke Save i vodna inspekcija prešutno odobravaju takvo stanje i ne vrše zakonom propisane kontrole nakon izdatih dozvola i time direktno pogoduju izvođačima radova. Sve ovo budi sumnju o korupciji većih razmjera i sprezi između nadležnih institucija i lokalnih privrednika koji se nelegalno bogate. U proteklim godinama je utvrđeno i postojanje korupcije u oblasti upravljanja vodotokom, zbog koje se gube značajni prihodi od izbjegavanja plaćanja naknade za stvarno izvađene količine šljunka. Takođe i ugrožava se životna sredina i devastira riblji fond, poljoprivredno zemljište i drugi resursi. Naime vađenje materijala može se vršiti samo u obimu, na način i u rokovima definiranom vodnom suglasnošću za vađenje materijala iz vodotoka i odredbama ugovora kako je to regulisano Uredbom o načinu i dodjeli prava za vađenje materijala iz vodotoka FBiH.

Građani koji su iskazali zainteresovanost za uključivanje u aktivnosti rješavanja problema na svojim primjerima ukazuju na njegovo postojanje, ali i ističu da se mora stvoriti šira građanska podrška i pritisak na donosioce odluka da se u ovoj oblasti stvari počnu rješavati. Istovremeno, ističu bojazan i reakcije lokalnih moćnika, vlasnika šljunkara, ali i pojedinih inspektora i predstavnika vlasti, kada se počne ukazivati na ovaj problem, jer očigledno da su u ovoj oblasti vrlo veliki novčani interesi i lobiji.

-  **NGG Zaustavimo nelegalnu eksploataciju šljunka u Maglaju**
-  **Maglaj**
-  **Zaustavimo nelegalnu eksploataciju šljunka u Maglaju**

Korupcija nije problem pojedinca!!!

Grupa ste građana koja se suočava sa korupcijom u vašoj zajednici i zbog toga ne možete da ostvarite pravo koje pripada vama ili širem krugu ljudi?

Trpите posljedice loših odluka donesenih usljed zloupotrebe položaja ovlaštenih lica ili nezakonitog postupanja vlasti?

Kontaktirajte nas u cilju dobijanja podrške vašim inicijativama u borbi protiv korupcije

063 396 536

protivkorupcije@ccibh.org









NERETVICA ĆE VJEČNO TEĆI

Građanska inicijativa „Pusti me da tečem“ iz Konjica poznata je javnosti po svojoj borbi protiv izgradnje 15 mHE na rijeci Neretvici i njenim pritokama. Cilj građana je stavljanje okolišne dozvole, do koje je Elektroprivreda, kao investitor, došla na sumnjiv način, van snage i zaustavljanje procesa izgradnje mHE na rijeci Neretvici.

„Njihovo je da probaju, naše je da ne damo i neće dobiti garantujemo“,

Vejsil Hondo, mještаниn






-  Udruženje građana – Neretvica „Pusti me da tečem“
-  Konjic
-  buturovicpolje
-  www.pustimedatecem.com
-  pustimedatecem@gmail.com



ODBRANIMO RIJEKE VIŠEGRADA

Neformalna grupa građana pod nazivom „Odbranimo rijeke Višegrada“ se početkom 2020. godine okupila sa ciljem očuvanja rijeka i sprječavanja gradnje malih hidroelektrana. Cilj inicijative je spriječiti izgradnje mHE na rijekama Rzav i Jablanica na području opštine Višegrad, jer su suprotne volji većine građana opštine Višegrad, stručne javnosti i ekoloških aktivista, te pogoduju primarno investitoru i, potencijalno, interesu pojedinaca koji su im omogućili ovaj posao.

-  Neformalna grupa građana „Odbranimo rijeke Višegrada“
-  Višegrad
-  Odbranimo rijeke Višegrada

„Polako sve nas čeka isti scenario sa problemima u vodosnabdijevanju ako se ne probudimo protiv zla zvanog #mHE“,




Đorđe Lazović, mještanim

INICIJATIVA ZA NAMJENSKO I TRANSPARENTNO TROŠENJE SREDSTAVA FONDA ZA ZAŠTITU OKOLIŠA FBiH

DIMNJAČAR



Grupa građana iz Zenice okupila se sa ciljem borbe protiv nenamjenskog i netransparentnog trošenja sredstava Fonda za zaštitu okoliša FBiH. Trenutni cilj građana Zenice je da učine javno dostupnim podatke o trošenju sredstava dobijenih od strane Fonda za zaštitu okoliša ,namijenjenim zaštiti zraka, a potrošenih od strane Vlade ZDK I Grada Zenica te da minimalno 50 % projekata podržanih iz sredstava dobijenih iz Fonda za zaštitu okoliša imaju za cilj poboljšanje kvalitete zraka.

-  Inicijativa za namjensko i transparentno trošenje sredstava Fonda za zaštitu okoliša FBiH
-  Zenica
-  NGG Dimnjačari

PROJEKTI VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE

CCI je u okviru javnog poziva za projekte vođenja građanskih inicijativa i kampanja u oblasti borbe protiv korupcije odabrao 13 organizacija/udruženja koje su započele realizaciju planiranih aktivnosti.

Helsinški odbor za ljudska prava pokrenuo je kampanju „Transparentno javno zapošljavanje – javni interes u borbi protiv korupcije u BiH“ u okviru koje je sproveo online anketu i pokrenuo interno istraživanje o iskustvima građana usljed postojećeg visokog nivoa korupcije u BiH. Prikupljeno je ukupno 356 odgovora, a trenutno se radi na sistematizaciji preporuka dobijenih iz online ankete.

U decembru je Inicijativu Udruženja građana Restart Srpska u okviru kampanje „Konkursom do posla!“ odbila Narodna skupština Republike Srpske, uz obrazloženja da peticija nema dovoljan broj validnih potpisnika. Nakon odbijanja, Restart Srpska je u saradnji sa narodnim poslanikom Davorom Šešićem usaglasio da se u ime kluba poslanika SDS-a identičan Zakon uputi u proceduru u NSRS. Zakon je upućen u proceduru krajem decembra 2020., a Nacrt izmjene i dopune Zakona o sistemu javnih službi trebao bi se početkom 2021. godine (februar) naći u skupštinskoj proceduri.

BIRN BIH je u okviru projekta „Transparentnošću protiv korupcije u pravosuđu“ nastavio kampanju pozivanja građana da prijave korupciju i pokrenuo kampanju novinara koji svakog ponedjeljka šalju zahtjeve državnom Tužilaštvu da optužnice budu javne. BIRN je zaprimio 18 prijava građana te je na osnovu toga objavljena i prva priča. Objavljene su 2 analize: jedna se tiče kontinuiranog problema tokom pandemije da kada VSTV zasjeda elektronski tim sjednicama ne mogu prisustvovati novinari; druga analiza se odnosi na problem nedostupnosti optužnica za korupciju javnosti, za šta mnogi stručnjaci smatraju da utiče na transparentnost rada pravosudnih institucija. Analize možete pročitati na portalu detektor.ba.

Udruženje “Baby Steps” je radilo istraživanje i analiziranje trenutnog antikoruptivnog pravnog okvira zdravstvenih ustanova (porodilišta), te praksi i iskustava porodilja i medicinskih radnika u okviru projekta “Borba protiv korupcije u porodilištima“. Na osnovu 2.700 odgovora dobijenih od porodilja i medicinskih radnika, uočava se da ne postoji niti jedna zabilježena prijava za korupciju u porodilištima, a sa druge strane mnoge porodilje, čak i medicinski radnici navode da su bili učesnici korupcije. Online ankete za porodilje i medicinsko osoblje su dostupne na sljedećim linkovima:

https://docs.google.com/forms/d/e/1FAIpQLSdurmbA-Uc98UYgaRKvIAGe64mfCvnS7A9jwG1vd-olP7Jeng/viewform?usp=sf_link (anketa za porodilje); https://docs.google.com/forms/d/e/1FAIpQLSf4Qe6__-4IfZCAKqaGWAepmidPIHwMrTpbiVGAwPhrPNm2mA/viewform?usp=sf_link

Udruženje građana RS “STOP MOBBING” je u okviru projekta „Osiguranje pristupa pravdi za prijavitelje korupcije u zdravstvu kroz uspostavljanje mreže za podršku na regiji Istočne Hercegovine” formiralo lokalnu Mrežu za borbu protiv korupcije u zdravstvu Istočne Hercegovine koju sačinjavaju predstavnici nevladinih organizacija, zdravstvenih ustanova, predstavnici okružnog tužilaštva, suda, policije, jedinica lokalne samouprave i novinari.

Udruženje građana “Tolerancijom protiv različitosti” (ToPeeR) je u okviru kampanje “Unapređenje devastiranog zdravstvenog sistema” pokrenulo peticiju za podršku građana u borbi protiv korupcije u zdravstvu. Osim toga provedeno je i istraživanje o nivou i konkretnim vidovima sitne korupcije u zdravstvenim ustanovama u Gradu Doboju i susjednim opštinama Petrovo i Stanari kroz anketiranje zdravstvenih radnika i pacijenata.

Omladinski centar Vermont iz Brčko distrikta BiH je u okviru svoje kampanje „Transparentno do jakog poljoprivrednika“ krenuo sa pripremom prijedloga novog Pravilnika o raspodjeli sredstava poljoprivrednicima koji bi vrijedio za naredne 4 godine. Podnesen je i prijedlog Odjeljenju za poljoprivredu, šumarstvo i vodoprivredu Vlade Brčko distrikta BiH za formiranje Radne grupe za izmjenu postojećeg pravilnika za dodjelu podsticaja poljoprivrednicima. Prema upućenom prijedlogu Radna grupa bi bila sačinjena od građana, poljoprivrednika i predstavnika nevladinog sektora koji su relevantni za problem koji obrađuje projekat.

Građani Doboja, okupljeni u organizaciju Centar za humanu politiku, pokrenuli su kampanju „Da se ne ponovi maj 2014“ u okviru koje su uputili 3 inicijative/prijave/otvoreno pismo, na osnovu kojih su se Vode Srpske, vodna inspekcija i dobojsko Tužilaštvo upoznali sa inicijativama i formirali inspeksijske i tužilačke predmete za kontrolu, provjeru i istragu. Dogovoren je i sastanak sa predstavnicima Voda Srpske, vodne inspekcije, gradske uprave i drugih institucija, koji će se održati u narednom periodu.

Udruženje građana “Ženski interaktivni ruralni centar” otpočelo je rad na kreiranju modela jedinstvenog Pravilnika kojim će se između ostaloga unaprijediti sistem prijave korupcije (postavljanje instrukcija pacijentima na odjeljenjima, postavljanje sandučića za prijavu, itd), te formirati stalne komisije za ispitivanje prijave korupcije, u koje će ući i stručni predstavnici NVO sektora u okviru projekta “Prevenција korupcije u zdravstvenom sistemu Bosne i Hercegovine”.

Udruženje „Ja bih u BiH“ je u okviru kampanje „Bez štele i pošteno“ započeo proces kreiranja online platforme za generisanje i razmjenu sadržaja, kao i draft dokumenta „Mladi i korupcija“. 20 mladih i 5 omladinskih nevladinih organizacija, obučeni o antikorupcijskom aktivizmu, radi u timovima na istraživanju statusa prošlih i aktuelnih slučajeva korupcije kao i kreativnom pristupu rješenju problema i na pokretanju inicijativa prema institucijama. Kreirana su 4 kreativna paketa rješenja mladih u borbi protiv korupcije koja potiču snažan i održiv antikorupcijski aktivizam. Kreativni paketi imaju simbolične nazive, na osnovu aktuelnih korupcijskih afera u BiH: Malina, Ključevi, Bombonjera, Koverta.

Udruženje poslodavaca u Federaciji BiH je u sklopu svog projekta „Poslovanje bez korupcije“ održalo prvi sastanak fokus grupe za izradu Zakona o jedinstvenom postupku izvođenja inspeksijskog nadzora koju sačinjava deset renomiranih kompanija iz cijele Federacije BiH iz različitih sektora privrede. Također, održan je i prvi sastanak fokus grupe za izradu izmjena i dopuna 8 postojećih Zakona koji potiču korupciju. Zadatak fokus grupe, koju čine predstavnici 20 kompanija članica Udruženja, pravni eksperti i menadžeri, je da identifikuje 5 prioriternih Zakona koje je potrebno izmijeniti ili dopuniti. U toku je izrada web stranice www.poslovanjebezkorupcije.ba.

Udruženje profesionalaca, trenera i službenika za javne nabavke u BiH je u sklopu kampanje “Kroz zdravije javne nabavke do smanjenja korupcije u zdravstvu” sklopio dogovore sa rukovodstvima 5 zdravstvenih ustanova sa područja Kantona Sarajevo i Sarajevsko - romanijske regije sa kojima rade na kreiranju prijedloga internih akata (pravilnika) o javnim nabavkama kojima se u značajnoj mjeri može suziti prostor za moguću korupciju i povećati efikasnost i transparentnost u trošenju javnih sredstava.

Unija Udruženja poslodavaca Republike Srpske je u okviru svoje kampanje pod nazivom „Smanjenje koruptivnih rizika u radu inspeksijskih službi u RS“ nakon niza aktivnosti uspjela omogućiti da na sajtu inspektorata bude omogućena prijava i lica zaposlenih u inspektoratu, a sam alat je vidljiviji i jasniji za upotrebu. U decembru 2020. direktor Unije udruženja poslodavaca RS, Saša Ačić, v.d. direktor Inspektorata Republike Srpske i Milovan Krčo, v.d. direktor Inspektorata Republike Srpske predstavili su “Brošuru o pravima i obavezama privrednih društava i inspektora tokom inspeksijskog nadzora“ te najavili zajednički rad i aktivnosti kroz ovaj projekat u cilju smanjenje koruptivnih rizika u radu inspeksijskih službi u Republici Srpskoj.

CCI je u okviru javnog poziva za projekte vođenja građanskih inicijativa i kampanja u oblasti borbe protiv korupcije odabrao još 5 organizacija/ udruženja koje su početkom 2021. započele sa realizacijom planiranih aktivnosti.

UDRUŽENJE SINDIKAT UPOSLENIKA FONDA je započelo projekat „Sistematično i beskompromisno protiv sistemske korupcije u javnom sektoru“. S obzirom na to da sistemska korupcija u javnom sektoru ugrožava pravo na rad i dostojanstvo osoba sa invaliditetom u FBiH pokrenut je projekat sa ciljem smanjenja korupcije u dodjeli sredstava, kojima raspolaže Javna ustanova Fond za profesionalnu rehabilitaciju i zapošljavanje osoba sa invaliditetom FBiH.

UDRUŽENJE GRAĐANA DEMOS je pokrenulo projekat „Skenirajmo korupciju“ sa ciljem smanjenja korupcije u javnim nabavkama specijalističkih medicinskih aparata na području Brčko Distrikta.

INCIJATIVA ZA ŠUMARSTVO I OKOLIŠ (FEA) je pokrenulo „Aplikaciju za anonimnu prijavu ilegalnih aktivnosti u šumarstvu uz pomoć građana“ s ciljem smanjenja korupcije i ilegalne sječe šuma na području Kantona Sarajevo i Zeničko-dobojskom kantonu.

UDRUŽENJE RESURSNI AARHUS CENTAR U BIH je započelo kampanju „Prekini lanac korupcije: pusti rijeku neka teče!“ sa ciljem smanjenja korupcije u hidroenergetskom sektoru u Bosni i Hercegovini.



- U decembru 2020. su održane 2 prezentacije javnog poziva u okviru programa podrške građanima u borbi protiv korupcije. Prva prezentacija održana je 09. decembra, na Međunarodni dan borbe protiv korupcije, za predstavnike omladinskih organizacija sa porukom MLADI SE ŽELE BORITI PROTIV KORUPCIJE! Učešće na ovom događaju su uzeli predsjednik ELSA (Europska asocijacija studenata prava), izvršna direktorica MRESVUBiH (Mreža savjeta/vijeća učenika BiH), predsjednik ASUBiH (Asocijacija srednjoškolaca u BiH), generalni sekretar VMFBiH (Vijeće mladih Federacije BiH). Druga prezentacija održana je krajem decembra sa predstavnicima asocijacije studenata Medicinskog fakulteta u Sarajevu.

- CCI je održao prezentaciju javnog poziva za predstavnike neformalne mreže pod nazivom Koalicija za borbu protiv korupcije u zdravstvu.



Građani u akciji



INSPEKCIJSKI NALAZI JASNO POKAZUJU DA INSPEKCIJA RADI U INTERESU INVESTITORA, A NE...
"STOP izgradnji MHE na Kasindolskoj rijeci"

TI BIH APELUJE NA DOM NARODA BIH DA USVOJI ZAKON O SUKOBU INTERESA
Transparency International BiH

VLADA RS ZA NOVU GODINU POKLONILA RIJEKU BJELAVU
NGG "Sačuvajmo rijeku Foče" i UG "Bjelava" - Inicijativa protiv izgradnje MHE...

POTVRĐENO DA SU BUNSKI KANALI ZAŠTIĆENO PODRUČJE NA KOJEM NIJE DOZVOLJENA GRADNJA
Inicijativa protiv izgradnje MHE Buna 1 i 2

I PORED OBEĆANJA O BRZOM RJEŠAVANJU PROBLEMA. DRVAR...

NOVOSTI

ANTIKORUPCIJA

Web portal antikorupcija.info ima za cilj da aktivira i motivira građane/ke da se pridruže u borbi protiv korupcije, prvenstveno kroz širenje informacija o borbi protiv korupcije, pozivanja na akciju, široko promovisanje uspješnih priča i slično. Web portal ima odvojeni segment pod nazivom Građani u akciji, u kojem je medijski prostor dat građanskim grupama koje se bore protiv korupcije i neregularnostima u njihovoj lokalnoj zajednici te problemima inicijativa. U okviru tog segmenta navedene su aktivne kampanje kojima podršku pruža CCI te su objašnjeni problemi svake grupe i navedene Facebook stranice putem kojih se može pratiti njihov rad. Putem tog segmenta na portalu se objavljuju sve aktuelnosti o grupama, sva dešavanja u vezi sa rješavanjem problema. Ukoliko želite da prvi imate informacije o svim koruptivnim dešavanjima u Bosni i Hercegovini, regiji i svijetu pravo mjesto za Vas je portal antikorupcija.info, online prostor gdje se afirmišu svi oni hrabri ljudi koji se bore protiv korupcije.

Ukoliko želite da prvi imate informacije o svim koruptivnim dešavanjima u Bosni i Hercegovini, regiji i svijetu pravo mjesto za Vas je portal antikorupcija.info, online prostor gdje se afirmišu svi oni hrabri ljudi koji se bore protiv korupcije.

Na portalu se nalaze segmenti Vijesti, U fokusu, Intervjui, Komentari i analize, Regija i svijet, Podcast, Podsjećanja i Lični stav.

Izdvajamo 3 najčitanije vijesti sa portala antikorupcija.info:

Spektakularan preokret: Policija otkriva da su radovi na MHE Bjelava rezultat prevare direktora

Da li je ovim okončana agonija mještana i eko-aktivista, koji se već mjesecima bore protiv izgradnje mini hidroelektrana na ovom području i vlastima na svim nivoima ukazuju na nezakonito postupanje investitora? I da li će konačno moći biti održana sjednica Skupštine opštine Foča, blokirana upravo na ovom pitanju?

Nastavak možete pročitati na:
www.antikorupcija.info

GRADANI U AKCIJI



► NGO "Sačuvajmo rijeku Foču" i UG "Bjelava" - Inicijativa protiv izgradnje MHE u opštini Foča - U fokusu
SPEKTAKULARAN PREOKRET: POLICIJA OTKRIVA DA SU RADOWI NA MHE BJALAVA REZULTAT PREVARE DIREKTORA "SRBINJEPUTEVA"?

© 15.10.2020. T14, Antikorupcija



Da li je ovim okončana agonija mještana i eko-aktivista, koji se već mjesecima bore protiv izgradnje mini hidroelektrana na ovom području i vlastima na svim nivoima ukazuju na nezakonito postupanje investitora? I da li će konačno moći biti održana sjednica Skupštine opštine Foča, blokirana upravo na ovom pitanju?

GRADANI U AKCIJI



► "Za legalnu eksploataciju minerala iz korta rijeke Bosne" - neformalna grupa građana Doboja, Modriče, Vukosevca i Šamca

PRITISAK GRAĐANSKIH AKTIVISTA URODIO PLODOM: "PLJUŠTE" KRIVIČNE PRIJAVE ZA NELEGALNU EKSPLOATACIJU ŠLJUNKA U SLIVU RIJEKE BOSNE

© 14.10.2020. T14, Antikorupcija (Foto: LjB)



Policajska uprava Doboj u završnoj je fazi kompletiranja pet krivičnih prijava sa dokazima za nelegalni iskop šljunka u slivu rijeke Bosne od Doboja do Šamca, a još šest predmeta je u fazi pripreme i dokumentovanja za podnošenje Okružnom javnom tužilaštvu Doboj.

Pritisak građanskih aktivista urodio plodom: "Pljušte" krivične prijave za nelegalnu eksploataciju šljunka u slivu rijeke Bosne

Policajska uprava Doboj u završnoj je fazi kompletiranja pet krivičnih prijava sa dokazima za nelegalni iskop šljunka u slivu rijeke Bosne od Doboja do Šamca, a još šest predmeta je u fazi pripreme i dokumentovanja za podnošenje Okružnom javnom tužilaštvu Doboj.

Nastavak možete pročitati na:
www.antikorupcija.info

Ko su odbornici Skupštine opštine Foča zbog kojih nije održana sjednica na kojoj se trebalo raspravljati o MHE na Bjelavi

„Goci Pavlović je doš'o. Svo drveće je počup'o, sa žilama i vuk'o s kamionima. Niko nije iziš'o, ni SUP, niti je iziš'la Opština, ni „Šumarstvo“. Niko nije smio da ga spriječi. Zato što on ima para. Radi šta hoće... Ovo je čisti kriminal i lopovluk.“

Nastavak možete pročitati na:
www.antikorupcija.info

GRADANI U AKCIJI




► NGO "Sačuvajmo rijeku Foču" i UG "Bjelava" - Inicijativa protiv izgradnje MHE u opštini Foča
KO SU ODBORNICI SKUPŠTINE OPŠTINE FOČA ZBOG KOJIH NIJE ODRŽANA SJEDNICA NA KOJOJ SE TREBALO RASPRAVLJATI O MHE NA BJELAVI?

© 05.10.2020. T14, Antikorupcija



„Goci Pavlović je doš'o. Svo drveće je počup'o, sa žilama i vuk'o s kamionima. Niko nije iziš'o, ni SUP, niti je iziš'la Opština, ni „Šumarstvo“. Niko nije smio da ga spriječi. Zato što on ima para. Radi šta hoće... Ovo je čisti kriminal i lopovluk.“

MONITORING JAVNIH NABAVKI



Putem Javnog poziva volonterima za učešće u borbi protiv korupcije u javnim nabavkama Udruženje CRMA je selektovalo prvu grupu od 15 volontera. Radi se o mladim osobama, studentima prava, ekonomije, kriminologije, politikologije, novinarstva, bezbjednosnih studija, iz različitih mjesta širom BiH - Ljubuškog, Tuzle, Pazarića, Sarajeva, Tešnja, Banja Luke. Ovi mladi ljudi će kao članice i članovi monitoring mreže steći znanja o monitoringu javnih nabavki i pružiti konkretan doprinos u praćenju javne potrošnje kroz sistem javnih nabavki, ali i upoznati se sa civilnim društvom i steći generalno iskustvo u antikorupcijskom aktivizmu, što može biti odskočna daska za jednu novu generaciju mladih građana koji će se uključiti u borbu protiv korupcije i jačanje kulture intergriteta. Udruženje CRMA je organizovalo i održalo online kick-off meeting sa volonterima. Javni poziv za volontere je otvoren non-stop. Novi članovi - volonteri će se kontinuirano priključivati aktivnostima monitoring mreže, po prispjeću njihovih prijava na javni poziv.

PRATIMOTENDERE.BA



PRATIMO TENDERE

Udruženje CRMA putem portala PratiMo tendere kontinuirano predstavlja javnosti uočene neregularnosti u sistemu javnih nabavki. Portal trenutno sadrži podatke o preko 3000 postupaka javnih nabavki ukupne vrijednosti preko 28 miliona KM. Od javne promocije portala objavljeno je 6 priča (case studies), koje ilustruju manjkavosti sistema javnih nabavki:

- Analiza podataka o planiranju javnih nabavki pokazuje da čak 25% ugovornih organa nije objavilo Plan javnih nabavki za 2020. godinu, čime su prekršene zakonske odredbe i dobre prakse transparentnosti i odgovorne javne potrošnje.

Više možete saznati putem linka: <https://www.pratimotendere.ba/bs-Latn-BA/articles/23/monitoring-planiranja-skoro-25-ugovornih-organa-u-bih-nisu-objavili-plan-javnih-nabavki-za-2020-godinu>

- Praksa kupovine zaštitne opreme u Sveučilišnoj kliničkoj bolnici Mostar ilustruje nabavku tzv. "cijepanjem nabavki" na manje transparentne postupke čime se izbjegava primjena transparentnijih mehanizama.

Više možete saznati putem linka: <https://www.pratimotendere.ba/bs-Latn-BA/articles/32/skb-mostar-cijepanje-nabavke-zastitnih-maski>

- Izgradnja javne rasvjete u Opštini Prijedor je primjer nesvršishodne javne nabavke - uštede ostvarene u avgustu 2020. putem realizovane E-aukcije potrošene su krajem 2020. godine netransparentnim ugovaranjem dodatnih radova i diskriminatornim pogodovanjem određenom ponuđaču.

Više možete saznati putem linka: <https://www.pratimotendere.ba/bs-Latn-BA/articles/28/opstina-prnjavor-ustede-u-javnim-nabavkama-spiskali-na-dodatne-radove>

Saznajte više o tome na koji način se troši novac građana kroz sistem javnih nabavki putem web portal [PratimoTendere.ba](https://www.pratimotendere.ba) te zapratite njihovu FB i Instagram stranicu.





USAID
OD AMERIČKOG NARODA



CENTRI CIVILNIH INICIJATIVA
ЦЕНТРИ ЦИВИЛНИХ ИНИЦИЈАТИВА



CRM@
CENTAR ZA RAZVOJ MEDIJA I ANALIZE

JAVNI POZIV VOLONTERIMA

ZA UČEŠĆE U BORBI PROTIV KORUPCIJE U
JAVNIM NABAVKAMA



Nudimo vam:

- edukaciju u oblasti monitoringa javnih nabavki
- mogućnost sticanja iskustva u antikorupcijskom aktivizmu
- izgradnju sopstvenih kapaciteta
- rad u stimulativnom okruženju
- podršku u učenju i savladavanju izazova
- potvrdu o stečenom iskustvu

Od vas očekujemo:

- da ste u dobi od 18 do 30 godina
- da ste ambiciozna osoba spremna na učenje
- da ste spremni aktivno učestvovati u borbi protiv korupcije
- da ste otvoreni za sticanje novih iskustava
- da ste spremni savjesno i odgovorno realizovati preuzete zadatke

CV i pismo namjere pošaljite na
e-mail: volonteripratimotendere@gmail.com

ZLOUPOTREBA JAVNIH SREDSTAVA U IZBORNIM KAMPANJAMA



Tokom izvještajnog perioda 74 posmatrača ispratila su 631 događaja javnih institucija u 70 lokalnih zajednica, a na 62% tih događaja prisutnima su se obraćali kandidati na lokalnim izborima, što jasno pokazuje njihovu svrhu. Također je ispraćeno 1046 predizbornih skupova, te su detektovana 1558 primjera gdje su javni resursi korišćeni za izbornu promociju stranaka i kandidata. Najveći broj zloupotreba odnosi se na intenziviranje javnih radova u predizbornom periodu, jer su za tri mjeseca evidentirana ukupno 1004 slučaja od kojih je 46% zabilježen u posljednjem mjesecu dok je trajala izborna kampanja.

Posmatrači su pratili i oglašavanje političkih partija putem billboarda u svojim lokalnim zajednicama. Tako je zabilježeno 2835 billboarda u 70 lokalnih zajednica, čija vrijednost iznosi najmanje 3,8 miliona KM. Kada se ovi troškovi zbroje sa troškovima oglašavanja na televiziji i u printanim medijima, koje je na relevantnom uzorku iznosilo 2,6 miliona KM, političke stranke obuhvaćene monitoringom u Bosni i Hercegovini potrošile su najmanje 6,4 miliona KM na oglašavanje u elektronskim i štampanim medijima i billboardima. Pored troškova drugih stranaka, ovom svakako treba dodati i troškove internet oglašavanja, koje je bio dominantni vid oglašavanja, ali čiji se troškovi ne mogu tačno utvrditi.

TI BIH je razvio mobilnu aplikaciju “Reflektor” koja je omogućavala izvještavanje građana u realnom vremenu o eventualnim zloupotrebama javnih sredstava u svrhu izborne kampanje i drugim nepravilnostima koje se pojavljuju u toku izborne kampanje – Lokalni izbori u BiH 2020.

Centralna izborna komisija po prijavama TIBIH do sada izrekla 44 kazne u ukupnom iznosu od 45.000 KM zbog preuranjene kampanje, a još se čeka ishod ostalih prijava.



REGISTAR FUNKCIONERA

Transparency International u BiH predstavio je javnosti Registar nosilaca javnih funkcija (www.registar.transparentno.ba), koji sadrži informacije o mandatima izabranih i imenovanih zvaničnika na svim nivoima vlasti u BiH.

Registar omogućava i pretragu nosilaca javnih funkcija sa višestrukim angažmanima, pretragu prema političkom subjektu kojem nosilac javne funkcije pripada, institucijama vlasti, administrativnom nivou na kojem obavlja funkciju i slično. Cilj registra je upoznati javnost sa podacima o tome koliko javnih funkcionera u BiH trenutno obavlja po dvije i više funkcija u javnom sektoru, kako bi se pratile njihove aktivnosti i identifikovali potencijalni slučajevi sukoba interesa.

Podaci u Registru za sada pokazuju da u Bosni i Hercegovini 61 funkcioner na državnom, entitetskom i kantonalnom nivou trenutno obavlja dodatne funkcije u institucijama, javnim ustanovama i javnim preduzećima, a mnogi od njih su cijeli ili dio mandata u direktnom sukobu interesa. 14 nosilaca javnih funkcija obavlja funkcije istovremeno u izvršnoj i zakonodavnoj vlasti.



Pravna pomoć

Pravna pomoć pružena građanima – putem besplatne linije za pružanje pravne pomoći zaprimljen 561 poziv, dok je tim Centra za pružanje pravne pomoći registrovao 70 slučajeva u kojima je reagovano prema različitim institucijama. Tako je upućeno 107 dopisa nadležnim institucijama, te proslijeđeno 57 odgovora strankama.

Od slučajeva po kojima je postupao Centar za besplatnu pravnu pomoć posebno se izdvaja onaj u kojem je Upravna inspekcija je po zahtjevu TI BiH za vršenje inspeksijske kontrole utvrdila nepravilnosti u Opštinskoj upravi Bileća i naložila prestanak radnog odnosa opštinskom menadžeru i usklađivanje Pravilnika o unutrašnjoj organizaciji i sistematizaciji radnih mjesta Opštinske uprave Bileća sa Zakonom o lokalnoj samoupravi. Pozicija opštinskog menadžera je bila predviđena protivno zakonu.

Više informacija pročitajte na: <https://transparentno.ba/2020/12/25/zasto-se-cekalo-se-20-mjeseci-tek-nakon-prijave-ti-bih-inspekcija-nalozila-smjenu-menadzera-opstine-bileca/>

Građani mogu anonimno prijaviti korupciju putem besplatne linije 0800 55555 ili e-mail adrese centar@ti-bih.org.



TRANSPARENCY INTERNATIONAL U BIH
CENTAR ZA PRUŽANJE
PRAVNE POMOĆI

**PRIJAVI
KORUPCIJU**

POTRAŽI PRAVNU POMOĆ

0800 55 555

WWW.PRIJAVIKORUPCIJU.ORG
WWW.TI-BIH.ORG





Podržano:



USAID
OD AMERIČKOG NARODA

Ova publikacija omogućena je uz podršku američkog naroda putem Američke agencije za međunarodni razvoj (USAID).

Sadržaj ove publikacije je isključiva odgovornost Centara civilnih inicijativa (CCI) i ne mora nužno odražavati stavove USAID-a ili Vlade Sjedinjenih Američkih Država.